

## **Marere Kori'uaina IOANE Ererena Hauna**

### *Puka Aona Irerena 'Abina*

Marere neiana ena poki hanona rua. Ioane nenuatae a'ikakauma haukia kebarainakia, weiana ia mai Tirama aika Hamaka, mai Nahuna Iesu Keriso ohi kipokia aokia kehamomo. Ibaruana hanona ia a'i nenuatae bai'oi haukia timai ti'oinakia ekia a'ikakauma Tirama herenai hauna katea'i parena. Maearima neiakia ekia hoahoa hanona wapurai temiaho ba na ti'abi aiho, "Hanopaka neiana tabakia hanona a'i tenamo. Iesu hanona Tirama nahuna, ua buonai ia maearimai a'i kemai, hanopaka neiana tabakia kipokia a'i katemiaho haeamo, aika maearima nahababaina 'abana hanona a'i ketai 'apuana." Haeamona ti'abi, "Maearima ha nenuatae kemiaho harai Tirama herenai raninai, ia hanona hanopaka neiana tabakia a'i keaonamo ainakia, weiakia paukiai aona a'i kearo'ari."

Marere neiana ererena hanona ba'iobi neiakia aiakia tibahuai haukia nibaki'a tohanakia. Ia ni'abi Iesu hanona emai ia hanona maearima tohana, ba weiakia Iesu tia'ikakaumana haukia hanona Tirama katenuataeai tohana mai maearima abomo kateaonamo ainakia.

### *Puka Paipana Apa'uakia*

- a. Roba iahu. (1.1-4)
- b. Ea mai Wapura. (1.5—2.29)
- c. Tirama nahuna mai tiaporo nahuna. (3.1-24)
- d. 'Abi tohana mai beho. (4.1-6)

e. Raona'au hoana. (4.7-21)

f. A'ikakauma ena hiabu. (5.1-21)

### *Mauri 'Abina.*

<sup>1</sup> Au bariu pou narere benimi hanona hau weiana popouna 'akinai emiaho hauna, weiana hauna haiamaiai taona, mahamaiai taihana, mahamai tohanai taiha haraina mai imamaiai ta'i 'apuana. Ia hanona Mauri 'Abina Keriso weiana mauri pokina hauna.

<sup>2</sup> Mauri neiana hanopakai ewaira tina. Mauri banaibanai hauna Keriso neiana taihana paunai pouna t̄ahinana t̄airoro aina heremiai. Ia hanona Hamana ohi temiaho ba heremiai ewaira tina.

<sup>3</sup> Ai taba taihana ābomo 'uruna taona hauna t̄airoro aina heremiai hanona wai mai ai kipokia kahabahaemo. Eka bahaeamo hanona Hamaka mai Nahuna Iesu Keriso aba aika kipokia.

<sup>4</sup> Ai t̄arere benimi ena poki hanona kipokia kahaonamo haemo.

### *Tirama Hanona Ea.*

<sup>5</sup> Pou Keriso herenai taona hauna bariu t̄airoro aina heremiai hanona neiana. Tirama hanona ea, Ia aonai hanona wapura ha aha'i 'akina.

<sup>6</sup> Aika paha'abi Tirama kipokia nahaba haemo iamo wapura aonai nahaka'a raninai aika hanona nahabai'oi mai Tirama ena 'abi tohana a'i nahaka'aina.

<sup>7</sup> Ia Tirama ea aonai nemiaho 'abana aika eai nahaka'a raninai aika hanona 'abaka kipokia kahabahaemo, Nahuna Iesu aruarunai eka ki'a ikoikia neutu obonakia.

<sup>8</sup> Aika paha'abi eka ki'a aha'i raninai aika kipoka nahabapo'onaka abomo Tirama ena 'abi tohana hanona aokai aha'i.

<sup>9</sup> Ia aika eka ki'a Tirama wairanai kahahina pounakia raninai ia hanona aia ibabua 'auna hauna mai bero hauna ba eka ki'a kehina haonakia abomo eka beho ikoiki'ai keutu obonakia.

<sup>10</sup> Aika paha'abi ki'a ha a'i hababaina raninai Tirama hanona bai'oi haunai nahabaona, abomo ena 'abi hanona aokai aha'i 'akina.

## 2

### *Keriso Hanona Aika Ibaraika Hauna.*

<sup>1</sup> Naha'u ki'ami e, au neiana narerena niwahi heremi hanona wai ki'a ha a'i katobabaina paunai. Ia hau ha ki'a nibabaina raninai aika ibaraika hauna ha nemiaho Hamana kehina bena aika paukai, ia hanona bero hauna Iesu Keriso.

<sup>2</sup> Ia kipona ena mauri ebaibeni bairarao tabanai eao eka ki'a ihina haona paunai, aika ikupaiaka mo paukai aha'i ia maearima ikoinai\* ekia ki'a paunai.

<sup>3</sup> Aika Tirama ehina benaka 'abikia nahaka'a ainakia raninai kaha'iobina aika hanona Tirama ha'iobina.

<sup>4</sup> Hau ha pe'abi petibaha, "Au Tirama a'iobina," ia Tirama ena rauhuhu a'i nika'ainakia raninai, hau weiana hanona bai'oi hauna, ia aonai Tirama ena 'abi tohana hanona a'i nemiaho.

<sup>5</sup> Hau ha Tirama ena 'abi nika'ainakia hauna hanona Tirama niraona'auai† tohana. Weianai kaha'iobi haraina aika hanona Tirama herenai nahamiaho.

---

\* **2:2:** (2) 'ao *hanopaka maikoinai*    † **2:5:** (5) 'ao *Tirama ena raona'au ia aonai*

6 Hau ha ni'abi ia Tirama herenai nemi-aho hauna hanona Iesu emauriaina maurina ihobonai kemauro.

*Rauhuhu 'Abina Mahamahana.*

7 E'u hau ki'ami e, rauhuhu 'abina neiana narerena niwahi hauna hanona mahamahana aha'i, ia rauhuhu 'abina 'ai'aina aba 'uainai toa'ikakauma aonai toa'ina, rauhuhu 'abina 'ai'aina neiana hanona aba to'ona 'abina.

8 Iamo rauhuhu 'abina neiana hanona mahamahana, anina tohana hanona Keriso mai wai heremiai aba nahaihana, pokina wapura hanona aba nikapare, ea tohana aba nirara.

9 Hau ha ni'abi ia hanona ea aonai nemiaho, iamo uaho'abana 'arina a'i ni'ari hauna hanona bariu wapura aonai nemiaho ohomo.

10 Hau ha uaho'abana niraona'au aina hanona ea aonai nemiaho, ba herenai ki'a aha'i, hau ha a'i kebabehona.

11 Ia hau ha uaho'abana 'arina a'i ni'ari hauna hanona wapura aonai nemiaho mai wapura aonai nika'a. Wapura ehore ia mahana aba ekaiabunakia buonai, aeana niao hanona a'i ne'iohina.

12 Naha'u ki'ami e,  
narere benimi ena poki hanona  
emi ki'a Keriso atanai  
aba ihina hao.

13 Hamamai haumi e,  
narere benimi ena poki hanona  
wai hau weiana popounai  
emiaho emai mo bariu hauna  
aba to'iohina.  
Hau 'aru'arumi e,  
narere benimi ena poki hanona  
wai hau ki'a obona aba

toba'ehona.

<sup>14</sup> Naha'u e,

narere benimi ena poki hanona

wai Hamaka to'iohina.

Hamamai haumi e,

narere benimi ena poki hanona

wai hau weiana popounai

emiaho emaimo bariu hauna

aba to'iohina.

Hau 'aru'arumi e,

narere benimi ena poki hanona

tutabura Tirama ena 'abi

wai aomia nemiaho ba

hau ki'a obona aba toba'ehona.

<sup>15</sup> Hanopaka mai aonai temiaho tabakia ikoinai a'i katoraona'au ainakia, iamo hau ha hanopaka niraona'au aina raninai, ia hanona Hamaka a'i niraona'auai tohana.

<sup>16</sup> Pokina hanopaka aona tabakia ikoikia hanona hauani ena nuatae ki'a tabakia katebabai, maha ena nuatae ki'a tabakia kateiha, mai obia tabakia kateapainakia, uahomakia ikoikia hanona Hamaka herenai a'i timai ia hanopaka herenai timai.

<sup>17</sup> Hanopaka mai aona inuatae aina tabakia ikoikia aba ti'akauma ore, ia Tirama ena nuatae akana tibabaina haukia hanona katemauri ba-naibanai.

### *Keriso Ena 'Ou Hauna.*

<sup>18</sup> Naha'u e, hanopaka kepua ranina hanona aba ekara'au. Pou aba tona Keriso ena 'ou hauna nimai, ia bariu Keriso ena 'ou haukia bo'okia hanona aba tewaira tina. Ua buonai aika ha'iohina rani puana hanona aba ekara'au.

19 Maearima weiakia hanona herekai tekarahi pokina ia hanona aika 'abaka tohakia aha'i. Ia aika 'abaka haukia raninai, aika kipokia pahami-aho haemo. Iamo ekia ka'a oboai kaha'iobi haraina ia hanona aika 'abaka aha'i.

20 Ia wai hanona Auba Robe weiana Robe hauna Keriso ebaibeni hauna aba toa'ina aomia, ua buonai wai ikoimiai Tirama ena 'abi tohana to'ioibina.‡

21 Au wai narere benimi hanona Tirama ena 'abi tohana a'i to'ioibina paunai aha'i, ia wai hanona Tirama ena 'abi tohana aba to'ioibina. Ba wai aba to'ioibina bai'oi hanona Tirama ena 'abi tohana herenai a'i nimai.

22 Bai'oi hauna hanona tai? Ia hauna ni'abi Iesu hanona Keriso aha'i. Maearima uahomana hanona Keriso ena 'ou hauna, ia hanona Hama mai Nahu ohi nebuniainakia.

23 Hau ha Nahu nebuniaina hauna hanona ia herenai Hama aha'i. Hau ha Nahu nibatohana hauna hanona Hama abomo ia herenai.

24 Popounai 'abi tona hauna hanona aomia kemiaho. Tona 'abina weiana katoka'aina raninai, wai hanona Nahuna aonai mai Hamana aonai katomiaho.

25 Neiana hanona Keriso kipona e'abi'uai aika 'euka, mauri banaibanai kebenaka.

26 Narere benimi weiakia ekia nuatae kate'oinimi haukia robakia ahuna.

27 Ia wai hanona Keriso ehore Auba Robe ebenimi aomia nemiaho, ua buonai maearima ha a'i keba 'iobinimi re'a abetaina. Pokina Auba Robe hanona taba ikoinai niba'ioibinimi, ena ba'ioibi hanona tohakia, ia a'i nibai'oi. Auba Robe

---

‡ 2:20: (20) 'ao wai Tirama ena 'abi tohana ikoinai to'ioibina.

eba'iobinimi ihobonai rani ikoinai Keriso aonai katomiaho.

<sup>28</sup> Naha'u ki'ami e, bariu Keriso aonai katomiaho, pokina ia ena mue mai raninai aika hanona kahatabura abomo a'i kahahaumaea ia wairanai.

<sup>29</sup> Wai to'ioquina Keriso hanona bero hauna raninai, kato'iohi haraina maearima weiakia bero akakia tibabai haukia ikoikiaki hanona Tirama nahuna.

### 3

#### *Tirama Nahunai Nahaeao Hauka.*

<sup>1</sup> Hamaraona harai, Hamaka ena raona'au herekai eapa'ua ki'a baha ba eaparinaka aika hanona Tirama nahuna. Aika hanona ia nahuna tohaka. Hanopaka haukia a'i te'iohinaka ena poki hanona ia Tirama a'i te'iohina paunai.

<sup>2</sup> E'u hau ki'ami e, bariu aika hanona Tirama nahuna, ia aika maearima aehomaka hanona a'i niwaira tina harai baha, iamo aika ha'iohina Keriso kewaira tina raninai\* aika hanona ia 'abanai kahaeao, pokina ia tohana kahaihana.

<sup>3</sup> Maearima ikoinai Keriso herenai buabeni neianai temiaho haukia hanona kipokia aokia ki'a keaha'i ihobona Keriso aona ki'a eaha'i 'abana.

<sup>4</sup> Hau ha ki'a nibabaina hanona Tirama ena rauhubu ni'oatana, pokina ki'a hanona rauhubu ni'oatana.

<sup>5</sup> Ia wai aba to'iohina Keriso ewaira tina hanona ki'a kea'i pare, ia aonai hanona ki'a ha aha'i.

<sup>6</sup> Ua buonai hau ha Keriso ohi temiaho oioi hauna hanona ki'a a'i nibabai to'ona. Ia hau ha

---

\* 3:2: (2) 'ao ua kehoma raninai

ki'a nibabai to'ona hauna hanona Keriso a'i eiha tinana abomo a'i e'iohina.

<sup>7</sup> Naha'u ki'ami e, hau ha beho babai 'ekakiai a'i meaoainimi. Hau ha aka berona nibabaina hauna hanona ebero, ihobona Keriso ebero 'abana.

<sup>8</sup> Ki'a nibabai to'ona hauna hanona Tiaporo 'euna, pokina Tiaporo hanona aba popounai ki'a ehabaina emai mo bariu. Tirama nahuna ewaira tina ena poki hanona neiana, Tiaporo ena aka kebapukuruna.

<sup>9</sup> Hau ha Tirama nahunai niao hauna hanona ki'a a'i nibabai to'ona, pokina mauri mahamahana weiana Tirama herenai emai hauna ia aonai nemiaho. Ia Tirama 'eunai erama paunai ki'a a'i kebabai to'ona.

<sup>10</sup> Weiana Tirama nahuna mai Tiaporo nahuna baiatahia kaha'iohi haraina. Hau ha aka berona a'i nibabaina 'ao uaho'abana a'i niraona'au aina hanona Tirama nahuna aha'i.

*Aika Ha Ha Kaharaona'au ainaka.*

<sup>11</sup> 'Uainai toa'ikakauma aonai pou tona hauna neiana: Aika ha ha kaha raona'au ainaka.

<sup>12</sup> Kaino 'abanai a'i katoao, ia hanona Tiaporo ena maearima, kipona hatina Abela eahu 'arina. Taba buonai Kaino Abela eahu 'arina? Pokina ia ena hoahoa hanona tehi'a, ia hatina ena hoahoa hanona tebero.

<sup>13</sup> Uaho'aba'u e, hanopaka haukia 'arimi a'i kate'ari re'a, a'i katota'u ta'u huri.

<sup>14</sup> Aika uaho'abaka naharaona'au ainakia paunai ha'iohina aika hanona 'ari aonai aba hakarahi mauri mahamahana aonai hatoto. Ia hau ha ena raona'au aha'i hauna hanona 'ari aonai nemiaho ohomo.

15 Uaho'abana 'arina a'i ni'ari hauna hanona ahuahu hauna, wai to'iohina ahuahu hauna aonai hanona mauri banaibanai a'i nemiaho.

16 Keriso ena mauri ebaibeni aika paukai. Neianai aika raona'au tohana hanona taba ha'iohina. Ua buonai aika abomo eka mauri kahabaibeni uaho'abaka paukiai.

17 Herenai taba tebo'o hauna uaho'abana neuraru hauna neihana iamo a'i nibaraina raninai, ha'iohina Tirama ena raona'au hanona ia aonai a'i nemiaho.

18 Naha'u ki'ami e, eka raona'au hanona 'abiai mo mai pinakai mo a'i kahahina 'abaeana, ia eka raona'au hanona eka hoahoa tohanai kahabaiha baiha aina.

### *Kahanuako'o Tirama Wairanai.*

19 Taeara neianai kaha'iohina aika hanona Tirama ena 'abi tohana kipokia nahamiaho, haeamona aoka ketabura Tirama wairanai.

20 Aoka kehinabe ki'anaka re'a, aika ha'iohina Tirama hanona eapa'ua ki'a baha ba aika aoka mai ha'iohi tabakia maikoina, abomo ia hanona taba ikoikiai ne'iohinakia.

21 E'u hau ki'ami e, aika aoka a'i kehinabe ki'anaka raninai aika mai taburaka Tirama wairanai kahakoroti.

22 Ba herenai taba ikoinai kahanoi haukia kebenaka, pokina ena rauhuhu 'abina nahaka'aina mai ibaonamona akana nahababaina.

23 Tirama ena rauhuhu 'abina hanona neiana, aika Ia Nahuna Iesu Keriso atana kaha'ikakaumana mai ehina benaka 'abana, ha ha kaharaona'au ainaka.

24 Tirama ena rauhuhu 'abina nika'aina hauna hanona Tirama aonai nemiaho, Tirama abomo

ia aonai nemiaho. Tirama Auba Robe ebenaka paunai, aika ha'iohina Tirama hanona aika aokai.

## 4

### *Tirama Aubana Mai Auba Ki'a Obona.*

<sup>1</sup> E'u hau ki'ami e, Auba Robe tea'ina na tiho haukia ikoikia ekia 'abi a'i katoba tohanakia, ia katohobo 'uainakia kato'iohina auba weiana hanona Tirama herenai emai 'ao. Pokina mahabanai haukia bai'oikia bo'okia hanopakai aba tewaira tina 'eka maikoinai.

<sup>2</sup> 'A wai Tirama ena Auba Robe ea'ina hauna hanona taeara neianai ko'iohina: Hau ha kehina pouna Iesu Keriso hanona hauaniai emai hanopakai raninai, auba weiana ia ea'ina hauna hanona Tirama herenai emai.

<sup>3</sup> Ia auba ha Iesu nebuniaina hanona Tirama herenai a'i emai. Auba weiana hanona Keriso ena 'ou hauna Tiaporo herenai emai. Pouna tona kemai ia aba emai bariu hanopaka neiana aonai.

<sup>4</sup> Naha'u ki'ami e, wai hanona Tirama 'euna, mahabanai haukia bai'oikia toba'ehonakia, pokina Tirama ena Auba aomia nemiaho hauna etabura ki'a baha ba tiaporo weiana hanopaka haukia herekia.

<sup>5</sup> Ia mahabanai bai'oikia hanona hanopaka 'euna, ua buonai hanopaka 'abikia mo tehinakia hanopaka haukia ia aiakia tiona.

<sup>6</sup> Ia aika hanona Tirama 'euna, hau ha Tirama e'iohina hauna hanona aiaka keona, ia hau ha Tirama 'euna aha'i hauna hanona aiaka a'i keona. Ihaiha nahomanai 'abi tohana aubana mai bai'oi aubana hanona aba kaha'iohi ainakia.

### *Tirama Hanona Raona'au.*

<sup>7</sup> E'u hau ki'ami e, ha ha hamaraona'au ainaka, pokina raona'au hanona Tirama herenai emai. Niraona'au hauna hanona Tirama nahunai niao, abomo Tirama ne'iohina.

<sup>8</sup> 'A a'i niraona'au hauna hanona Tirama a'i e'iohina, pokina Tirama hanona raona'au.

<sup>9</sup> Tirama hanona ena raona'au na ebaiha aihonaka, Nahuna hamo hamona euhuna emai hanopakai, weiana ia paunai aika kahamauri.

<sup>10</sup> Raona'au tohana hanona neiana: Aika Tirama a'i haraona'au aina, ia Tirama aika eraona'au ainaka paunai Nahuna euhuna emai aika eka ki'a ihina haona tabanai eao.

<sup>11</sup> E'u hau ki'ami e, Tirama hanona na eraona'au aihonaka buonai, aika abomo 'abaka ha ha ua kaharaona'au aihonakia.

<sup>12</sup> Hau ha Tirama a'i eiha 'apuana, iamo aika 'abaka ha ha kaharaona'au ainakia raninai, Tirama hanona aika aokai nemiaho, ena raona'au hanona aba nitabura 'au aika aokai.

<sup>13</sup> Tirama Auba Robe ebenaka buonai, ha'iohina aika hanona Tirama aonai nahamiaho haeamona ia abomo aika aokai nemiaho.

<sup>14</sup> Tirama Nahuna euhuna emai hanopakai maearima ibamaurikia haunai eao, weiana ai aba taihana mai tahina pouna.

<sup>15</sup> Hau ha ena 'abiai keba tohana Iesu hanona Tirama Nahuna raninai, Tirama hanona ia aonai nemiaho, ia abomo Tirama aonai nemiaho.

<sup>16</sup> Tirama niraona'au ainaka hauna ha'iohina mai naha'ikakaumana.

'Abi tohana Tirama hanona raona'au. Hau ha maearima niraona'au aina hauna hanona Tirama aonai nemiaho, Tirama abomo ia aonai nemiaho.

<sup>17</sup> Taeara neianai raona'au aokai aba nitabura 'au, ba weianai aika hanona a'i kahata'u Tirama

ena bakai wapuna aonai, pokina hanopaka neiana aonai eka mauri hanona Keriso ena mauri ihobona.

<sup>18</sup> Tirama ena raona'au aonai hanona a'i kahata'u, Tirama ena raona'au taburana hanona ta'u maikoina neu'u ahinakia, pokina ta'u aonai puma raonana nemiaho. Ua buonai hau ha nita'u hanona ia aonai raona'au a'i nitabura harai baha.

<sup>19</sup> Aika ha ha 'abaka naharaona'au ainakia pokina Tirama aika eraona'auai 'uainaka paunai.

<sup>20</sup> Hau ha ni'abi ia Tirama niraona'au aina iamo uaho'abana 'arina a'i ni'ari raninai, ia hanona bai'oi hauna. Hau ha uaho'abana nahaihana hauna a'i niraona'au aina hanona Tirama a'i nahaihana hauna keraona'au aina a'i ketaina.

<sup>21</sup> Keriso rauhuhu 'abina ebenaka hauna neiana: Tirama niraona'au aina hauna hanona uaho'abana abomo keraona'au aina.

## 5

### *A'ikakauma Haukia Hanopaka Ena Hoahoa Tiba'ehonakia.*

<sup>1</sup> Maearima weiana Iesu hanona Keriso nia'ikakaumana hauna hanona Tirama nahuna, Hama niraona'au aina hauna hanona nahuna abomo niraona'au ainakia.

<sup>2</sup> Tirama naharaona'au aina mai ena rauhuhu 'abikia nahaka'a ainakia raninai, neianai kaha'iobi haraina aika hanona Tirama nahuna naharaona'au ainakia.

<sup>3</sup> Aika Tirama naharaona'au aina hanona ena rauhuhu 'abikia kahaka'a ainakia. Abomo ena rauhuhu 'abikia hanona a'i tepahihi aika herekai.

<sup>4</sup> Pokina Tirama nahuna ikoinai hanona hanopaka hiabuna tiba'ehona. Aika Tirama

naha'ikakaumana, hoahoa neianai hanopaka ena hiabu nahaba'ehona.

<sup>5</sup> Ua buonai hanopaka hiabuna tiba'ehona haukia hanona weiakia tia'ikakauma Iesu hanona Tirama Nahuna haukia mo ikupaiaikia.

*Tirama Ehore Nahuna Pouna Ehinana.*

<sup>6</sup> Iesu Keriso hanona beiai mai aruaruai emai, beiai e'uere robe mai matiu ibiri ropo 'arunai e'ari. Ia hanona beiai mo a'i emai, ia beiai mai aruaruai emai. Auba Robe abomo nibatohana, pokina Auba Robe hanona Tirama ena 'abi tohana.

<sup>7</sup> Ua buonai teaihau hanona Iesu tibatohana:

<sup>8</sup> Auba Robe, bei, mai aruaru,\* teaihau ekia 'abi hanona hamona, Iesu hanona Tirama Nahuna.

<sup>9</sup> Aika maearima tebatohana 'abina naha'i taeanakia, ia Tirama ebatohana 'abina hanona eapa'ua ki'a baha pokina ia hanona Tirama, ebatohana 'abina hanona ia Nahuna pouna.

<sup>10</sup> Maearima ha Tirama Nahuna nia'ikakaumana hauna hanona batoha 'abina neiana ia aonai nemiaho. Tirama a'i nia'ikakaumana hauna hanona Tirama bai'oi haunai nibaona, pokina maearima weiana hanona Tirama ebatohana 'abina Nahuna herenai e'uahina hauna a'i nia'ikakaumana.

<sup>11</sup> Tirama ebatohana 'abina hanona neiana: Tirama hanona mauri banaibanai ebenaka, ba mauri neiana hanona Nahuna Iesu Keriso aonai nemiaho.

<sup>12</sup> Tirama Nahuna ea'ina hauna hanona mauri aba ea'ina, 'a Tirama Nahuna a'i ea'ina hauna hanona mauri a'i ea'ina.

---

\* **5:8:** (8) *baika te'abi, Hamana mai 'abi tohana mai Auba Robe teaihau*

*Mauri Banaibanai.*

<sup>13</sup> Tirama Nahuna atana tua'ikakaumana haumi marere neiana narere benimi, pokina wai kato'jobina mauri banaibanai hanona aba toa'ina.

<sup>14</sup> Aika hanona tabura neiana ha'ina Tirama wairanai, aika ia ena nuatae ihobonai kahanoina raninai aiaka niona.

<sup>15</sup> Aika ha'jobina Tirama herenai taba taba kahanoi ainakia hanona aiaka niona raninai, ha'jobi haraina hanoiai tabakia hanona aba ha'inakia.

<sup>16</sup> Hau ha uaho'abana herenai ki'a weiana a'i keba'ari baihana hauna neihana raninai ahanai kebahuba'ari, ba Tirama kehore uaho'abana weiana mauri kebena. Au maearima weiakia ekia ki'a a'i keaoainakia 'ari 'ekana hauna na'uahina. Ia maearima baikia ki'a ha tibabaina weiana keaoainakia 'ari 'ekana. Au ki'a weiana ahanai kebahuba'ari hauna robana a'i nahuna.

<sup>17</sup> Beho babai ikoinai hanona ki'a, ia ki'a baikia hanona a'i tiaoinaka 'ari banaibanai 'ekana.

<sup>18</sup> Aika ha'jobina Tirama nahunai tiao haukia hanona ki'a a'i tibabai to'ona. Tirama Nahuna ni'aeabunakia, hau ki'a obona ia a'i kea'i 'apuanakia.

<sup>19</sup> Ha'jobina aika hanona Tirama nahuna, ia hanopaka maikoina hanona hau ki'a obona ena hiabu aonai.

<sup>20</sup> Abomo aika ha'jobina Tirama Nahuna emai hanona aoka ebaeana, weianai aika Tirama tohana kaha'jobina, haeamona aika hanona Tirama tohana aonai mai Nahuna Iesu Keriso aonai nahamiaho. Iesu Keriso hanona Tirama tohana abomo ia hanona mauri banaibanai pokina.

<sup>21</sup> Naha'u ki'ami e, bai'oi tiramakia herekiaia kato'ima 'ima harainimi herekiaia katokapare.

**'Abi'uai Apa'uana Mahamahana**  
**The New Testament in the Waima Language of Papua**  
**New Guinea**  
**Nupela Testamen long tokples Waima long Niugini**

Copyright © 2002 Wycliffe Bible Translators, Inc.

Language: Waima

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

---

PDF generated using Haiola and XeLaTeX on 18 Apr 2025 from source files dated 31 Aug 2023

cec16783-6218-5812-9255-85478fb5e61c